

I NEMÎS DAL OMP

E jè une leç di psicologie. Cui nemîs di fûr a rivin a parâsi sieransi dentri, ma se il nemî al è in cjase, no son Sanz ch'a nus salvin. Al è il destin di ducj i popui, massime chêi piçui.

I grancj, par fruçâju, a conprin un pôs di lôr. Chêi, ur vierzaran dutis lis puartis, ur semenaran dute la disconcuardie che covente par fâ colâ ance il regno plui organizât. Par, chest Gjesù nus vise che no le varin dure cun chêi di fûr, ma cun chêi di dentri. Chêi di fûr a son fuarz, e àn bêz e podê. A cjatin sinpri cualchidun che si lasse inceâ e ch'al fâs la part di Gjude cul so popul, tradinlu e vendinlu.

E la storie nus conferme che la lidrîs dai traditôrs e cres in ducj i tarens di chest mont e in dutis lis etis. Tant in Friûl che in altrò; tant une volte che comò. Ancje se il nestri popul al à il pît sul cuel, al à sinpri cualchidun ch'al vuadagne a stâ cui parons e a dâur une man par tignîlu sclâf.

Chêi a son i unics, vêrs nemis che bisugne vuardâsi. Parceche se il nemî al è zà dentri, nond'è clostris ch'a tegnin. In ogni popul si cjate int che si à metude a l'aste sul marcjât de pulitiche, dai bêz e dal podê. Parfin tal cjanps di concentrament, i piês ch'a torturavin a erin de stesse çocje dai torturâz.

Si trate alore di cunvincisi di une robe sole: il mont si salvarâ cuanche ognun al lavorarâ il so toc. La storie e ganbiarâ cuanche il popul al sarâ cussì san di rivâ adore di isolâ ducj chêi còjars ch'a disfin par ordin dut ce che si fâs. Cence fasi inlusions che i nemîs a vegnin dal mont de lune.

A son zà in cjase. A son chêi di cjase.

Setembar 1980

pre Antoni Beline